



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 3



Iran-i Israel nem tenokdangba agütsütsü ayongzük

Israel nungeri Nazi-i parnok dak benshiba amai benshir: Mehbooba

VOL. XXI NO. 12 (ADOK 12) DIMAPUR YANGTEPNÜ (THURSDAY) MONGPUTENI (OCTOBER) 19, 2023 ₹ 5.00

NPCC-i Wanglem Konyak nem ticket agütsü

Kohima, October 18, 2023 (TYO): Nagaland Pradesh Congress Committee (NPCC)-i Bodbarnü 43-Tapi Assembly Constituency by-election atema Wanglem Konyak nem party ticket agütsüögo.

August 28, 2023 nü NDPP MLA aser Social Welfare Advisor Noke Wangnao mapang tatsüka shiranger asüba ajanga by-election agütsüsa akümer.

Tanü Congress Bhavan Kohima nung ticket agütsüba sentong nung NPCC president S. Supongmeren Jamir-i o jembidang "by-election nung takok angutsü atema party züngsem ajaki meranga inyaksü" ta ashi.

"Congress-i nübertem den tesentaktep tajung lir aser nübertem asoshi inyaksü. Nübertem yaritsü atema Congress-i Wanglem Konyak toktepdaktsür. Nübertemi temelenshi atema Congress

pusemstü imlar" ta Supongmeren-isa ashi.

"NDPP-i BJP den lokteper sorkari yimsü asür aser Khristan state ka asünung Congress-i nübertem asoshi noktaksü renema lir. Congress-i Tapi constituency nung alirtem atema dang masü saka külemi amalitepa inyaka aotsü atema tokteper" ta paisa ashi.

Wanglem Konyak-ia constituency nung alirtem dang akokba tashi constituency aser state renloksü atema inyaksü nangzük.

Taoba assembly election nung Wanglem-i NPF candidate ka ama toktepdang votes 82-i dang tamakok ngua liasü.

"Congress-i tensa den apet election nung tokteper saka tanga political party temibo tash amshia tokteper. Anungji nisung ajaki Wanglem yaritsü ayongzük" ta NPCC working president Khriedi Theunuo-ia ashi.

DoNER ketdangsüri Zangkham yimtsüng semdang

Tizit, October 18, 2023 (DIPR): Ministry of Development of North Eastern Region (DoNER) nung Deputy Secretary Nehjamang Simte-i Tizit sub-division kübok Zangkham yimtsüng semdang.

DoNER ketdangsür Nehjamang-i Model Blocks & villages (SAMBHAV) maparen yaritsü atema Zangkham semdangi aru. SAMBHAV ya terenlok manguba nisungtem tashi itdaksütsü atema tenzükba sentong ka lir.

SAMBHAV ya pilot program ka lir aser tang North Eastern

region district 40 kübok Gram Panchayats/Villages 75 nung inyaker.

Bodbarnü Deputy Secretary Nehjamang Simte-i Zangkham yimtsüng nung nübertem den ajuruteper sensaksema mapang ka agi.

Iba sentong ya SDC (C) Tizit, Tumben P Tsanglao aser North Eastern Development Finance Corporation Ltd. State Coordinator Nribemo Lotha na lenisüba kübok agi aser line department ajak nungi ketdangsürtem aden.

School Education-i NSSB recruits arangshir

Kohima, October 18, 2023 (TYO): Department of School Education (DoSE) Nagaland-i Bodbar nungi NSSB recruits atema anogo ananü orientation sentong ka tenzükogo.

NSSB ajanga mapa angurtem nem tenüngsang agüja jembidang School Education, Additional Secretary Hiazu Meru-i "nenok dak sempet tajung lir aser len shitak jajatsü atema training agütsüla" ta ashi.

"Nenoki rules, orders, notifications, office memorandums jungjunga meteta alitsüla aser nenok madak bangdakpur dangi mapang shitak nung files agütsütetsüla" ta paisa ashi.

Paisa department nung tasenpur aser tejenpur ajak dang technology melenshiba sülen anidaksü aser state sorkari e-office tenzükba indang nenshia metetdaksü.

"Naga nunger ya lisopurtem lir aser iba jagi asenok lokti mapa jenti lir. Iba ajanga asen loktiliba

akakanganga lir, ajisüaka sorkar mapa inyaker temi ketdangsübaren ajungtsü atema lokti mapa inyakaka mapang amshi ashitsüla. Talisa education department nung tesayurtem aser staff tem Nagaland kinük ajak nungi arutsü" ta Hiazu Meru-isa ashi.

"Yimtsüngtem nung inyakba tesayurtem atema rural development department den convergence programme ka alitsü aser idangji yimtsüngtem nung tesayurtem asoshi ki yanglutsü onük jembitsü" ta paisa ashi.

Iba sentong nung School Education Principal Director Thavaseelan K-ia government employees conduct rules indang jembia.

Education department ya Nagaland nung department tulutiba nung tanabuba lir aser khuret kar lir saka department-i education system tajungtiba kümdaktsütsü atema mapa inyaker, ta Thavaseelan-isa ashi.

Hornbill Festival matongdang NH 29 renemtsüla: CM Rio



October 18, 2023 nü Nagaland Chief Minister Neiphiu Rio-i line departments/sectoral departments ajak den Hornbill Festival 2023 atema senden ka amenba angur.

Kohima, October 18, 2023 (DIPR): Nagaland Chief Minister Neiphiu Rio-i National Highways Infrastructure Development Corporation Limited (NHIDCL) dang Hornbill Festival 2023 matongdangsa National Highway 29 mapa tembangtsü tetuyuba agütsüögo.

Küm tenet süiaka NHIDCL-i Dimapur nungi Kohima tashi four-lane merenemba atema mepelaba olen ka ashi.

Bodbarnü CM Rio-i Hornbill Festival 2023 atema line departments/sectoral departments den senden ka

amendang iba osang metetdaksü.

Senden nung Rio-i department ajak dang Hornbill Festival atema renemtsü ayongzük.

"Asenoki Heritage Village Kisama nung kiojen, metsümeshidak tajungba küma yanglutsüla aser tobur junga renemtsüla. Road & Bridges department-ia Kisama yimtsüng nung aser temeket nung gari lenmangtem anepalutsüla" ta paisa ashi.


"Hornbill Festival nung linük aser alima dang Nagaland nung tajungtiba sayur anungji asenoki

tajungtiba anepaluba amongtsüla. Hornbill Festival ya alimai meteta kümogo anungji 24 buba benjungmong meraketa amongtsüsa departments aser agencies ajaki renemtsüla" ta CM Rio-isa metetdaksü.

Paisa Hornbill Festival indang social media coverage aser World War II vintage car rally atema nenshia jembia.

"Department ajaki Hornbill Festival amongtsü atema renema lir. Department aser sendaktepa alirtem den asemen tashi sendentem menogo" ta Tourism and Higher Education Minister Temjen Imna Along-ia ashi.

NSF-i APAAR- 'One nation, one student ID' magizüker



Dimapur, October 18, 2023 (TYO): Union Education Ministry-i Automated Permanent Academic Account Registry (APAAR) mapa tenzüktsü sangdongba magizüker ta Naga Students' Federation (NSF)-i metetdaksüögo.

"APAAR atema tebilemstü aika lir aser iba ajanga kaketshirtem temeten aser privacy nung kongshitsü aser ano shisaliok rejutem nem nüngdak maliba khuret benloksür" ta NSF president Medovi Rhi aser assistant general secretary Kenilo Kent nati sangdong ka nung ashi.

APAAR dang "One nation, one student ID" ta ajar aser iba ashishitep aketba maparen ya 'EduLocker' ta ajaba Education Ecosystem Registry ka yanglutsü atema lir.

National Educational

Technology Forum (NETF)-i ashiba APAAR ajanga pre-primary nungi higher education tashi kaketshir shia indang Aadhaar ID dak alia ano unique identification number ka agütsütsü ta NSF-i ashi.

"Sorkaribo iba ya kaketshirtem zünga aoba aser ajangtetbatem meteta alitsü atema lir ta ashir saka iba mapa nung tebilemstü aika lir. APAAR nung Aadhaar dak sendakba data security aser privacy breaches indang junga benteta mali" ta parnoki ashi.

"Tanü data breaches kanga atalokba mapang ka nung ano security maparen kecha melii data collection aser storage mapa ka tenzükba atema shisabulur" ta NSF-isa ashi.

"Ano, shisaliok rejutem ketdangsüba mapa balala den tang kaketshirtem optional

Aadhaar verification indang khuret beloka lir. Anungji APAAR registry mapa tenzükba ajanga tesayurtem aser staff mapa teimba akümtsü aser iba ajanga shisaliok jenjang raksatsü" ta NSF-isa metetdaksü.

APAAR enrolment atema tsüraburtem dang nungi temelaba meshiba kija yagi kaketshirtem indang rights & privacy kümzükba meyetetsü, ta parnoki ashi.

"Sorkari APAAR data ya bangdak government agencies den dang lemsateptsü ta ashir saka data tim mesüi amshitsü akok. Iba atema District Information for Education portal lapokba amshidang cyber attacks ajurura kaketshirtem indang nija temetetsü lendongi aitsü. Iba jagi APAAR mapa meyipa repringshitsü ayongzük" ta NSF-isa ashi.

Kohima nung Tsewlaknyi benjong telungjem nung mungogo



Kohima, Mongputeni/Oct. 18 (TYO): Yimkhiung kin asoshi tongtipang benjong, Tsewlaknyi ya State Academy Hall, Kohima nung October 18, 2023 nü munga liasü.

Iba sentong ya Yimkhiung Union Kohima ajanga ayongzük aser yangji tesemdang tongti ama Advisor, Fire & Emergency, Home Guards & Civil Defence, Relief & Rehabilitation, S. Kisumew Yimchunger dena liasü.

Yimkhiung kin asoshi Tsewlaknyi ya tongtipang benjong ka lir aser iba mapang nüburtem tanur tain melemsai telungjem nung amunger.

Ajidang masü iba benjong nungya akhi mapangbo jong, nü,

nok, lasang aser lasang jang amala meshiteta liasü. Ajisüaka tanü tendak apet Khristan yimsü agizükba sülenbo nüburtem adenshia takum tajungba nung alitsü asoshi sarasademer.

Yimkhiung Union Kohima ajanga sentong tulu ayongzükba asoshi Advisor Kisumew Yimchunger-i pelaba lemsatop aser iba ama benjongmung yagi Yimkhiung nung tali lungjemtsü aser tarutsü jenjang tajungba yanglutsü, ta ashi.

Iba sentong ya K. Asang Yimkhiung lenisüba kübok agi, kong Wongtokiu, Pastor, YBCK ajanga sentong tenzuka sarasadema liasü.

A. Akhum, President,

Yimkhiung Union Kohima ajanga tarur pela agizükba o jemi aser Kiutsuthong ajanga iba benjongmung ratet shia liasü.

Iba sülen Shophu-i anir Angopung Cultural Club ajanga sobaliba ken ka aten aser Hanji H., Vice President, YTC; Adv. Laji Luyanba; aser S. Obed Quinker, Chairman, NBRM and General Secretary (Adm) NDPP Nagaland nungeri o tatsütsü jembia liasü.

Maneni Daniel Kiutsathong Company ajanga Tsewlaknyi ken aten aser Sanglimew Moses-i melepzüng o jembiba sülen Racheal Bendang, Associate Pastor, YBCK ajanga sarasadema sentong tembang.

Civil Secretariat telung nung security asoshi mera tasen agir

Dimapur, Mongputeni/Oct. 18 (TYO): Nagaland Civil Secretariat nung security tsütsü tangatetep nung mera tajungba agitsü mechi Home Department ajanga tang nungi tenzuka tsünglangen shia aliba ozüngtem ya amshitsü.

Civil Secretariat telungi aittsü bilema alir nisung ajaki reception area nungi 'visitor's gate pass' meshitsüla. Ibai tesemdang ajak asoshi alitsü.

Gate pass meshiba mapang

nisung shia Driving License, PAN (Permanent Account Number), Aadhaar Card, Voter ID, National Passport, Central/State Government ID aser PSU ID sayutsüla.

Directorate aser District tem nungi sorkar ketdangsurtem Civil Secretariat nung official duty mesüra senden balala nung adentsü arur temi security personnel dang pei official identity card sayutsüla.

Civil Secretariat nung

inyaker ketdangsur aser staff tem dang security personnel temi meshidang sayutsü official ID card teti bena alitsüla.

Identity card tejangja magütsüteter mesüra temelaba maliba oset mesüra hadir bena alirtem Secretariat telungi maitdaksütsü security personnel nem temelaba agütsür.

Ano temesepba mozü/yi chia-jemer alirtema maitdaksütsü.

Miss Assam 2023 nung Opangtongdang Jamir-i tongti shilem agitsü



Dimapur, Mongputeni/Oct. 18 (TYO): Miss Assam 2023 sentong nung Nagaland nungi Naga Fashion Supermodel, Influencer, Mister International India 2012, Pageant Coach, Opangtongdang Jamir ya creative director, mentor aser grooming guru ama shilem agitsü jaoka lir.

Miss Assam 2023 title asoshi Assam kübok tesem balala nungi candidate 20 tokteper aser Grand Finale ya October 20, 2023 nü Ambiance Banquet, Exotica Greens Zoo road Guwahati nung

agitsü. Candidate tem ajunga tejangraba tulu nung lir aser parnok dak nükla tulu lir aser pei aliba tesem nung mapa tajung balala inyaka jajar, ta Opang Jamir-i ashi.

Iba show ya round asem lemsar agitsü aser mezüng roun ya traditional round (Mekhela Chator), tanabuba round ya cocktail dress (designer cocktail high) aser tasembuba round ya long gown (designer Dreams zone institute) alitsü.

Director Shyamanga Kashyap aser Co- Director Akumnaro Imsong (former Miss Mokochung 2006, Miss Nagaland 2006, Mega Miss Northeast 2008) ajanga ashiba agi, taküm iba title sponsor ya Dabur Gulabari alitsü aser Associate Partner ya Vinho Porto, Spirit Adventure aser Eco Spirit alitsü.

Iba tetoktepba nung official photographer ya Jeremy Huhnar aser Videographer Anthony Wowv alitsü.

ESD&E Directorate nung gari aitba aser ayuba junga reprangtsü

Dimapur, Mongputeni/Oct. 18 (TYO): Office compound telung nung temelaba makai gari aitba aser teti gari anena ayuba asoshi Directorate of Employment Skill Development & Entrepreneurship sangdong ka tebilemtsü lemsatopa liasü.

Yamaji temelaba makai gari aitba aser anena ayuba ajanga office indang osettsüset raksaba aser tim masüba mapa inyakba densema timtem balala ajurur.

Item tebilemtsü mechi Directorate ajanga taoba mapanga office compound telungi gari aitba aser anena

ayuba meittsü metetdakja liasü. Office mapang süir office complex-i nisung aitba aser gari anena ayuba azüoktsü asoshi ozüng tesashi amshitsü ta Directorate ajanga sangdong nung matetdaksü.

Shirisa item ozüng nung aibelenba putetdir tim ketdangsur nem osang agütsütsü aser tapet mera agitsü.

Office environment aser security ajungtsü mechi nisung ajaki iba totuyuba sülen tashi anga anidaksü ayongzük, ta sangdong ajangasa ashi.

NST Department ajanga Seniority List yanglua lir

Dimapur, Mongputeni/Oct. 18 (TYO): Transport Department, Government of Nagaland ajanga totuyuba agütsüba ama NST Department, Nagaland nung October 2023 tashinung mapa inyaka alir indang 'tentative seniority list' yanglua lir, ta sangdong ka ajanga ashi.

Anungji iba department nung mapa inyaker ajak dang Transport Department nungi mapa inyakba anogo ajak nung mapa inyakba mapang 'tentative list' copy meshitsü totuyuba agütsüogo.

List nung tenüng inoka aliba

dak sendakba nung tai apuba mesüra metongshitsü lira itemji representation ajanga documentary evidence den phone number, tang aliba posting tesem densema Secretary, Transport Department, Government of Nagaland nem tezüluba nung agütsütsüla.

Tezüluba ajunga iba sangdong agütsür anogo 30 tsüngta agütsütsüla, ta ashi.

Latetja aliba mapang nung representation kara marura, 'tentative seniority list' ya "Final" akumtsü, ta sangdong ajangasa ashi.

Nagaland nung State Education Achievement Survey agitsü

Dimapur, Mongputeni/Oct. 18 (TYO): National Council of Educational Research and Training (NCERT), New Delhi ajanga tawa totuyuba agütsüba ama 2023 küm asoshi State Education Achievement Survey (SEAS) ya Nagaland nunga agitsü.

Iba survey ya school 1643 (Government school 805, Private school 800 aser Central school 38) nung agitsü.

Danga state aser Union Territories den külemi Nagaland nunga iba survey ya November 3, 2023 nü agitsü.

SEAS nükjidong ya Classes 3, 6 aser 9 nung kaketshir temi angazükba asadangtsü asoshi lir.

SEAS sentong nung kaketshir 36,833 aser Field Investigators 1,843 alitsü. Iba mapa inyaksü asoshi SEAS nem tenüng agütsü aliba District Nodal Officers, Block Coordinators aser Field Investigators atema orientation sentong October nung agitsü.

SEAS ya kanga tongtipang ta angateta sample school 1,643

nung aliba classes tem November 3, 2023 nü danga mapa kecha meinyaksü.

SEAS den sendaktepa aliba stakeholders, talisa Directorate of School Education, SCERT, NBSE, aser Samagra Shiksha dang state nung iba survey takok ngua agitsü asoshi nungdakba mera agia renemshitsü totuyuba agütsüogo.

Iba training ka kanga tongtipang aser tsükdakrongdak mapa ka asünung, October 20, 2023 anepdang 10:00 ako nungi tenzuka Secretariat Complex anasa Capital Convention Centre, Kohima nung anogo ka training agitsü.

Iba sentong nung District Education Office (DEO), District Mission Authority (DMA), aser District Institute of Education and Training (DIET) ajak adentsü metetdaksüogo.

Samagra Shiksha ajanga latetja aliba ama Travel allowances (TA) aser daily allowances (DA) agütsütsü.

PSARA kübok private security personnel training agitsü

Dimapur, Mongputeni/Oct. 18 (TYO): Home Department (Political Branch) ajanga taoba mapang sangdonga aliba ama Private Security Agency Regulation Act, 2005 (PSARA) kübok private security personnel nem training agütsütsü atema Central Training Institute, Home Guards', Civil Defence & State Disaster Response Force, Toluvi, Dimapur ya training center asütsü temelaba

agütsüogo. Anungji Nagaland nung aliba private security agencies temi PSARA ozüng nung aliba ama training agütsütsü nungdaka aliba nübu tasen tenüngtem Director General, Home Guards', Civil Defence & State Disaster Response Force, New Capital Complex, Nagaland, Kohima nem November 30, 2023 tashinung agütsütsüla, ta sangdong ka ajanga ashi.

GOVERNMENT OF NAGALAND

DIRECTORATE OF HEALTH AND FAMILY WELFARE

NAGALAND: KOHIMA

No.DHFW-5-23/TRG-NSG/2023/4428-31

Dated, Kohima, the 18th OCT 2023.

DECLARATION OF RESULT FOR GNM EXAMINATION 2023-2024

SL. No	Roll No.								
1	138	21	47	41	1162	61	280	81	660
2	1332	22	263	42	366	62	307	82	186
3	135	23	115	43	134	63	393	83	1259
4	901	24	1361	44	638	64	1156	84	1398
5	375	25	618	45	892	65	1242	85	810
6	4	26	467	46	162	66	1536	86	1481
7	49	27	54	47	98	67	282	87	50
8	844	28	455	48	332	68	426	88	1195(BT)
9	96	29	626	49	1120	69	192	89	1355(BT)
10	103	30	874	50	781	70	445	90	1136(BT)
11	1583	31	388	51	1416	71	55	91	576(BT)
12	1073	32	1221	52	1019	72	413	92	1197(BT)
13	286	33	789	53	153	73	992	93	1155(BT)
14	1509	34	1597	54	692	74	156	94	821(BT)
15	437	35	839	55	291	75	1330	95	219(BT)
16	308	36	216	56	823	76	1586	96	1455(BT)
17	107	37	422	57	1207	77	657	97	534(BT)
18	444	38	796	58	945	78	652	98	1094(BT)
19	1570	39	716	59	317	79	647	99	1216(BT)
20	782	40	387	60	88	80	1323	100	433 (BT)

WAITING LIST:-

SL. No	Roll No.
1	1335
2	1254
3	312
4	762
5	792

- NOTE:** 1. Admission/Placement order for GNM will be issued on 25th October 2023 from 11:30 AM at Conference Hall, Directorate of Health & Family.
2. The Candidates are to bring their admit card.

No.DHFW-5-23/TRG-NSG/2023/4432-35

Dated, Kohima, the 18th OCT 2023

DECLARATION OF RESULT FOR FHW EXAMINATION 2023-2024

SL. No	Roll No.	SL. No	Roll No.	SL. No	Roll No.
1	445	11	413	21	28
2	419	12	34	22	13
3	114	13	387	23	436
4	16	14	446	24	135
5	366	15	27	25	470
6	495	16	390	26	33(BT)
7	300	17	401	27	285(BT)
8	178	18	129	28	85(BT)
9	528	19	372	29	473(BT)
10	367	20	147	30	133(BT)

WAITING LIST:-

SL.No	Roll No.
1	89
2	119
3	88
4	500
5	284

- NOTE:** 1. Admission/Placement order for FHW/ANM will be issued on 25th October 2023 from 11:30AM at Conference Hall, Directorate of Health & Family.
2. The Candidates are to bring their admit card.

(DR. RITU THURR)
Principal Director
Directorate of Health&Family Welfare
Nagaland, Kohima

Israel nungeri Nazi-i parnok dak beshiba amai beshir: Mehbooba Srinagar, Mongputeni/ October 18 (Agencies):

Israel aser Gaza tsungda anogo 12buba raraba mapang aser alima nung lenirtemi iba rara anentsü ayongzükba mapang taoba mapang Jammu & Kashmir Chief Minister, Mehbooba Mufti-i Israel sashia aitsüogo.

Bodhbarnü PDP tongti lenir, Mehbooba-i, akhidang Nazi teloki Israel nunger jenti tepsetba ama tang Israel-ia kasaji Palestine nunger dak inyakdar, ta ashi.

Laisa Muslim linüktem dang iba tatalokba ya repranga dangbo meyutsüsüla, ta ashi.

Iba tebilemtsü bentettsü atema America ama linüktemi tiyongtsü ia inyaktüsü, ta lai ashi.

PDP headquarters nung osangbenertem den jembidang lai, "Holocaust mapang Nazi teloki Israel nunger dak beshiba ama tanü Israel-ia Palestine nung kasaji beshir. Tetsungdangji ya dang-Holocaust mapang gas chambers amshi saka tanübo

bomb amshir, aser ibaji ajanga tila tanurtem aser tetsürtem densema aika tepseter," ta ashi.

Israel-i Gaza anema apusoba ya 'nisung jenti tepsetba' lir, saka tejashitsükaji-alimai ola madoki repranga dang toktsür aser alima nung kiralongra kanga bulua ataloker, ta dang jembir, ta Mehbooba-isa metetdaksü.

"Alima nung kiralongra ya Palestine ken o mebentetba agi lir. Israel Yihuda nungertemi Palestine nunger li atsümbanga aliba ya Palestine nunger nem meyipa agütsüsüla, saka parnok tepseter," ta lai metetdaksü.

Laisa, "Alima nung tashi tulu aliba linüktem aser Islamic linüktemi Palestine yaritsüla, ajisüaka tia maka parnoki sangdong dang asütsür. Palestine nunger electricity nokdangogo, chiyungtsü den supplies ajak nokdangogo, mozü mangur aser ajak mokdangogo," ta metetdaksü.

Laisa, yamai maneni dang ora alima nung yimjung raksatsü, ta shisem.



भारतीय राष्ट्रीय कांग्रेस
Indian National Congress



October 18, 2023 nü AICC Headquarters, New Delhi nung Congress Tir Mallikarjun Kharge den party lenirtem- Sonia Gandhi, Rahul Gandhi aser KC Venugopal nunger Congress Election Committee senden nung adenba noksa nung angur. Iba senden nung taruba Rajasthan assembly elections atema jembia liasü.

Birth Certificate taila ken o nung SP lenir Azam Khan tepoukdak ayutsü

Rampur (Uttar Pradesh), mapang Uttar Pradesh nung chief minister, Akhilesh Yadav- i, yimtenren tsütsü nung court kati Samajwadi Party (SP) lenir, Azam Khan den pa kinüngtsü aser jabaso na densema küm tenet tepoukdak ayutsü obandang agütsüogo.

Bodhbarnü Rampur MP- MLA court-i birth certificate taila ken o nung Azam Khan den pa kinüngtsü, Tanzin Fatima aser jabaso Abdullah Azam Khan na densema par asemprong jail nung küm tenet puoktsü obandang agütsü.

Court-i iba obandang agütsüba sülen par asemprong anir oa jail nung puokogo.

Osangbener den jembidang taoba mapang DGC (crime), Arun Saxena-i, "Azam Khan, pa kinüngtsü Tanzeem Fatima aser jabaso Abdullah Azam Khan nunger aitsüba sülen court-i par asemprong küm asem nungi tenet tashi jail nung puoktsü obandang agütsü; iba dak alia senchi 15,000 achi," ta metetdaksü.

Court-i iba obandang agütsüba sülen Samajwadi Party tongti lenir aser taoba

mapang Uttar Pradesh nung chief minister, Akhilesh Yadav- i, yimtenren tsütsü mangyangtsü atema Azam Khan aser par kibong ajak anema inyak, ta metetdaksü.

2019 küm BJP MLA, Akash Saxena-i Abdullah Azam Khan ket nung birth certificate ana lir, ta tai tonglokja ken o benoka liasü. Kasa ken o nung par tsürabur- Azam Khan aser Tanzin Fatima na anema-a tai tonglokja liasü.

Abdullah Azam-i pa melungba nung birth certificate anaprongla amshi. Birth certificate ka Lucknow municipality-i agütsüba liasü aser ka Rampur municipality-i agütsü.

Abdullah Azam-i mezümbuba birth certificate ji bendangleni aotsü atema passport yanglutsü asoshi amshi aser tanabuba birth certificate ji sorkar official nungdak balala atema amshir.

Bushisüngdangba ajanga certificate anapronglaji tim mastüba inyakyim ajanga yanglu aser jelia asalentong yangluba liasü, ta bushitet.



October 18, 2023 nü New Delhi nung Union Minister of State, L. Murugan-i Operation Ajay kübok Israel nungi arur sensotem agizükdang tangokba noksa nung angur. Nepal nunger 18 densema passenger 286 New Delhi tonga aru.



TIR YIMYIM YIMOBILEM (EDITORIAL)

DIMAPUR YANGTEPNÜ, MONGPUTENI (OCTOBER) 19, 2023

State Pongu Nung Election

- *Tangsen Lemtur*

Taoba hopta Election Commission of India (ECI)-i November 7 nungi tenzüka November 30 tashi nung state pongu- Chhattisgarh, Mizoram, Madhya Pradesh, Rajasthan aser Telangana nung assembly elections agitsü sangdongogo. Taruba ita agitsü aliba assembly election ya sangküm Lok Sabha election atema 'semi-final' asaya ka mesüka asütsü. Tang item state pongu nungi state ana nung Congress sorkar lir, Madhya Pradesh nung BJP sorkar lir aser Mizoram o Telangana na nung regional party sorkar lir. Taruba assembly elections ya BJP-i aniba NDA teloktep aser tawa tentetba INDIA teloktep na tsüngda tang mezüng tetendangba ka amai nisung aikati züngshitsü. Madhya Pradesh, Chhattisgarh aser Rajasthan state tem nung BJP aser Congress na kanga atongtepa tokteptsü saka Telangana aser Mizoram na nungbo party anaprong jenjang junga mali. Assembly elections atema nüboyim tenzüka BJP-i Centre nung sorkari inyaktetba mapatem sangdonger aser Congress-i tawa Bihar state nung agiba ama linük tesem ajaklen caste census agitsü nangzükba den külemi party-i yimsüsüba state tem nung terenlok mapatem sangdonger. Madhya Pradesh nung BJP lenir, Shivraj Chouhan tesüiba küm aika Chief Minister inyaka arudar, ajisüaka state sorkari rongsenkettzüng tsütsü junga meinyakba aser loktiliba nung nüburtem bendangshidanga züngshiba atema aika melung mesüi aliba mapang ka nung election agitsü. Rajasthan nung state sorkari benokba mapatong balala ajanga Chief Minister Ashok Gehlot kanga nungtugu kümogo, ajisüaka Congress party telung nung mangatettep adoka lir aser ibaji temai adokra party akoksatsü. Chhattisgarh nunga Chief Minister Bhupesh Baghel-i Congress party telung nung mangatettep adoka aliba bentettsüogo aser sorkari inyaktetba mapatem sangdonga maneni sorkar akümstsü nükjidong lir. Taküm Karnataka assembly election nung Congress-i takok tulu anguba sülen Telangana nung Congress asüngsashiogo, anungji state nung ruling Bharat Rashtra Samithi den parnoki kanga atongtepa tokteptsüsa jenjang ka nung lir. Mizoram nung Chief Minister Zoramthanga ya state nung dang masü saka linük nung kanga nungtugu Chief Minister tem rongnung züngshir. Zoramthanga-i aniba Mizo National Front (MNF) ya NDA teloktep nung densema lir. Zoramthanga-i 1998 aser 2003 nungi kümsük (term) anaben Chief Minister inyak, tang kümsük tasembuba inyaker aser taküm election nung MNF-isa takok ngura pai kümsük pezübuba Chief Minister inyaksü. Ajisüaka state nung opposition party Zoram People's Movement (ZPM) kanga tashi itta kümogo aser taküm election nungbo parnoki MNF den kanga atongtepa tokteptsüsa jenjang ka nung lir. State ponguprongla nung ABP-CVoter-i voters dang parnok tebilemba asüngdanga survey ka agia iba osangji sangdongogo. Madhya Pradesh nung Congress-i menden 113 nungi 125 shi angutsü aser BJP-i menden 104-116 shi angutsü, ta ABP-CVoter survey ajanga bushitet. Rajasthan nung Congress-i menden 59-69 dang angutsü aser BJP-i menden 127-137 shi ngua sorkar akümstsü, ta parnoki asadantet. Chhattisgarh nung BJP-i menden 39-45 angutsü aser Congress-i menden 45-51 angutsü; Telangana nung BRS-i menden 43-55, Congress-i menden 48-60 aser BJP-ibo menden 5-11 shi dang angutsü, ta parnoki asadantet. Mizoram nung Congress-i menden 10-14, ruling MNF-i menden 13-17 aser ZPM-i menden 9-13 shi angutsü. Mizoram nung sorkar tentettsüsa party ka kijai menden peria mangutsü, anungji teloktep sorkar arutsüa akok, ta parnoki asadantetogo.

OLEMSABANG

LENNIR-i AIBELNRA LINÜK ASER NÜBUR DANGI TEMERENSHI ARUR

- L.Kika pongener.


(Yashi adok nungi...)

Tanü asen lima nung, loktiliba ajak nung lennir-i kanga junga meshidadangi telemtetba agiba agi, linuk/nübur ajak dangi temerenshi aruba, aser iba temenen jagi linuk/nübur ajunga timtema alitsüa akok. Tanü lokti teimba ka nung mangatettep/ tsükchitep agi sunga aliba ya, jungjunga shisadanga, lennir-i kanga junga meshisadangi telemtetba agiba agi, nübur dena timtema alitsü akok. Tanü asen lima nung lokti ajak nung lennirtemi tip külen dang tejak shitsüba, tular-tilar, takar-sensaker bendanga amshiba agi sunga lir. Lokti nung, lennir-i nübur nem pei temeden ashitsü/jembitsü sabang (Platform) sadema melapoktsüi ajepbanga/arakbanga yura, ajibo tashiyim mapa asütsü. Lokti nung lennir-i tip külen dang tejak shitsüra, ajibo tanak-temesung bendangba asütsü. Aji oda, akhi putu nungbo, lennir-i kechi telemtetba temzüng-ozüng agütsüdir, iba nungji nübur ajaki ola madoki anidak. Ajisuaka, tanübo nisung ajak temeteter dang, ajak ket nung rongsen lir, nisung ajak pei pei yari tashi lir, aser tanübo Procedures, Rules, Constitution, Legal, Court, Human Rights & Freedom of Speech etc. yamala agi mekabanga lir. Aser kija/lokti shia iba nungji temeden sadem-sadema kar...Anungji lokti lennir ajaki ken o telemtetba agidang...'Pokpo Yimyim' amai tenuk amour telemtetba magitsüla...Saka kinuk ajaklen kanga junga shisadanger dang telemtetba agitsüla. Aji oda, mesura, 'Poru lung nung chidak ama' chidaktsü aser lokti ka maak-asütsü.

Tanü asen lima nung, lokti ajak nung, tanak dang tanak ta meshiteter, aser temesung dang temesung ta meshiteter. Tashitemeteter nungi angazükba...Germany lima nung Dictator Hitler aindang, pai Board tanak nung Chalk temesung agi zülua yur, iba ya tanaka ta shiang...ta par nübur dang ashi, aser Germany nungeri pa tsübu agi tanaka...ta ashiba otsüsutsü sua jembir. Tanü asen lokti nung, rongsen ketdangsuba, ochimashi aibelenba nübur ajaki sadakjema nguaka/metetaka, tai-a ta meshiteti mimbanga/ajembanga ayur, yongji ochimashirtem tan masür aser tangar lennir-ia tarentak/tetsübo mekai ochimashi inyaker. Tanü rongsen akar/tashi akartemi, asen loktiliba ajak ajepbanger, parnoki aibelenba metetyongjia, par dang apoa, meshia, chi-jema ali nungji par dang ochi o ashitsü tsübur. Tanü asen lima shirangbaji lennir-i pei tashimait/pei aibelenba, hau...ta meshiteter. Shirnoki yimjak nung yabo tai-a...ta metongshitsür, item-jiang meyiper pa/la kija tuteta tetla-tetshir. Yongji tanü asen lokti nung tasü-ita ochi jembir mali kümogo. Atangji, lennir-i kanga junga meshisadangi telemtetba agira, linuk aser nübur ajak dangi atakadem/temerenshi arutsü. Anungji lokti lennir ajaki kanga kümdanga asen lokti anitsüla.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazüngeru angateta agitsü mepishir**

Gaza nung aliba Tenla ki tejentiba nung nisung aika jenokdakja lir



Gaza nung aliba Greek Orthodox Arogo Tenla ki noksa nung angur.

October 18, 2023: Israel aser Hamas kiralongrartem raraba mapang Gaza nung Tenla ki tejentiba- Greek Orthodox Arogo Tenla ki raksatsüogo, ta tiyazü nung olulu proka liasü, ajisüaka iba Tenla kidangji Khristan aser Muslim nung densema yimsü balala amangertem aika jenokdaktsüdar, ta osang jangjaogo.

Greek Orthodox Church of Saint Porphyrios ya Gaza nung Tenla ki tejentiba lir. Israel-i anünglen nungi amakba mapang nung iba Tenla ki raksatsüogo, ta taoba hopta olulu proka liasü.

Ajisüaka Gaza yimti tejenba kübok al-Zaytun section nung aliba Arogoi official sangdong ka ajanga, Israel nungeri bomb amshia amakba mapang iba Tenla ki meraksatsü, ta metetdaksü.

Iba Arogo nungja ya St. Porphyrios nungtem nung

jaloktsü. St. Porphyrios ya A.D. 395 nungi AD 420 tashi Gaza nung tongti putir inyaka liasü. Tang aliba Tenla ki ya 1100s mapang nung Crusaders-i yanglushiba lir.

Osangbener den jembidang iba Arogo nung putir Elias-i, Israel nungeri sepatemi tekülem ki aika poksatsüogo saka Israel-i iba Tenla kibo mepoksatsütsü, ta ashi.

Elias-isa, iba Tenla ki raksatsüra ibajiboyimsü anema inyakba asütsü aser aibelen tulu dang masü saka meimchirtem anema inyakba asütsü, ta ashi.

Palestine nungeri Khristan George Shabeen-i, Israel nungertemi anünglen nungi amakba mapang nung Arogoi Tenla kidang parnok jenokdaksüba ajanga par kibongbo kümzük, ta metetdaksü.

"Aonung onok külemi

mejeptepa amonger. Muslim nungeri aser Khristantem, tanur-tain ajaki yimjung atema sarasademer," ta paisa metetdaksü.

2014 küm Israel nungeri bomb ajanga amakba mapang nunga iba Tenla kidang Palestine Muslim nungertem aika jenoka liasü.

October 7 nü Hamas teloki Israel amakba mapang America nungeri 30 densema nisung 1,400 dak tema asüba den 3,400 yiruogo; iba dak alaka Hamas teloki America nungeri kar densema Israel nungeri 199 pua lir.

Iba sülen Israel sepatemi amakdang Hamas kiralongrar 1,500 dak tema tepsetogo.

Gaza Health Ministry-i ashiba agi, tang tashi nung Palestine nungeri 2,700 dak tema tepsetba den külemi 9,900 dak tema yiruogo.

Israel aser Gaza na nung yimjung atema ayongzüka sarasadem

October 18, 2023: Tang Middle East nung rara tamajungba akümba mapang nung Yirusalem nung Arogo lenirtem telok kati alima tesem balala nung Khristantem dang iba region nung yimjung atema sarasademtsü ayongzüka liasü.

Mongolbarnü (August 17) Yirusalem nung Arogo balala nung tongti lenirtemi sangdong ka ajanga Khristantem dang, "Tesüiba hopta ka tsüngda Temeshi Lima (Yirusalem) kanga melenshiogo. Rara tamajungba kümdar aser tim masüba nung civilian ajak amaker. Tensa tamajungba akümer aser tai maket nüburtem teimba akoksar; taraksatsüba aser nisung jenti asüba kuliji Gaza nung jangja-jangja angur," ta metetdakja liasü.

Parnokisa telok ajak dang tai maket nisungtem kümzüktsü aser rara süngjemtsü mepishi.

Tanü tashi nung Israel nungeri 1,400 dak tema asüba den nisung meyrjang aika

yiruogo. Gaza nunga nisung 2,800 dak tema asüba den meyrjang aika yiruogo.

Yirusalem nung Anglican Archbishop, Hosam Naoum-i, tesempa aser rara anentsü atema onoki maneni sarasademmer; ochi temeden, taitoktep aser yimjung atema sarasademer, ta ashi.

"Onokisa Tsüngrem dang asen linüktem aser alima tesem balala nung lenirtem aser telemteba agirtem melungjang melenshiogang ta sarasademer, kechiyong asenok melungjang nung temeim nungdaker, taochi sayutsü nungdaker aser ajak den yimjung nung alitsü nungdaker. Meimchir akhümtsüba melungjang aser tasüba dang nungibo taküm ang shimtsü atema tangatetba nungdaker," ta paisa metetdaksü.

Anglican Communion (AC) aser World Council of Churches (WCC)-ia kasa tayongzüka agüja liasü.

Hombarnü Anglican Communion nung Secretary

General, Bishop Anthony Poggo-i, "Yimjung atema aser mangatetep bentetsü atema linük anati ken o jembitsü nungdaker. Israel nungeri aser Palestine nungeri naprongla sadoksadoka yimjung nung alitsü nungdak," ta metetdaksü.

Anglican Communion (AC) nung Director of Communications, Gavi Drake-i, iba region ya tetoktepba aliba tesem ka lir saka Israel nungeri aser Palestine nungeri teimbaka dak kasa nükjidong lir, ta metetdaksü.

"Israel aser Palestine nungeri teimbaka kasa tangatetba lir. Kiyonger ama parnok tesünap nung alitsü jangrar," ta paisa metetdaksü.

Yimsü alia amangertemi iba rara tamajungba kümdaksür, ta shia pai Khristantem dang telok anaprong atema sarasademtsütsü mepishi.

Arogo lenirtemi ayongzüka ama October 17 nü alima tesem ajaklen Khristantemi lumia sarasadema liasü.

ANOGO ABEN TSÜNGREM DEN

Meimtsü Angazükang

Medemeri medemer asoshi temeim nung aser nisung ajak asoshi temeim nung Kibubai nenok tali rena züindakjang.

Saka adianu meimtepba indang nenok dangi zülutsü tenungdaksü maka, kechiaser medemer o medemer na meimteptsü Tsüngremi nenok dang sayur. 1 Tesaloknika 3:12; 4:9.

Tsüngrem temeim lir (1 Yn. 4:16). Pa yimyaji tabensa temeim lir, saka temenen yong Pa temeim Pa chirtem dangi teti yimya nung angati marur. Na temeim mesayuba kibong ka nungi iner alitsü akok. Nai meimba kar ajanga ne nem timtem agütsür alitsü akok aser tanaben iba timtem marudaksütsü atema ne mulungjang meranga kümer alitsü akok. Nai kar dang meima alitsü akok saka o nung aser mapa nung temeimji mesayuteti alitsü akok.

Pauli Tesalonika nung aliba Khristantem meimtepa alitsü zülü (1 Tesa. 3:7). Parnoki koda meimteptsü aji sayutsü Paul menungdak, kechiaser Tsüngremi parnok dang meimteptsü sayutsü. Tsüngremi parnok nem Pa temeim agütsütsü aser parnok Pa anidakdang, Pai iba temeimji parnok ajanga renlokaksütsü. Parnoki kar dang memeimtetti lira Tsüngremi Tanela Temeshi ajanga parnok meimdaksütsü.

Tsüngremi asenok tashi mait asoshi Pa taochi agütsür, aser asenoki tangar dang meimtsü renemdaksür. Idakji balaka kecha mali. Nisung tamajung danga meimtsü Tsüngremi sayur.

Nai kar dang meimtsü timtema bilemer asü? Tsüngremi na yaritsü. Pai nai ne tsürabur, kinungbo- kinungtsü, ne chirtem, ne tembartem, mesüra tsükchirtem meimdaksütsü. Nai ne temeim tetezü kaa mesayutetra, ibaji koda inyaksü Tsüngremi ne dang sayutsü. Temeim nung kiburji Tsüngrem lir. Na tangar den alidang temeim adokdaksütsü mesüra sayutsü Tsüngrem dang asungdang.

Arogoi Sikkim nung tzümetsüng lendong ajanga kongshirtem yarir

October 18, 2023: Tawa Sikkim state nung tzümetsüng lendong atalokba sülen iba ajanga kongshirtem taküm asentenshiba nung Arogoi yaridar; tzümetsüng lendong nungji nisung 40 shi asü aser nisung 76 shi samar tang tashi mangur.

Darjeeling nung aliba Arogo nung public relations officer, Alex Gurung-i, "Ozü volunteer temi tzümetsüng agi kongshiba kiojentem süshiba nung yaritepdar; tzümetsüng agi kongshirtemji tang relief camps mesüra khen atema yangluba kitem nung jenoka lir," ta metetdaksü.

Arogo nungi volunteer temi tzümetsüng agi kongshiba kitem nung lishi indoktsür aser relief camp nung alirtem pei kidangi meyipa arudaksür, ta putir Gurung-i metetdaksü.

October 4, 2023 nü tzümetsüng lendong nung ki 2,002 raksatsü aser tang tashi nisung 1,852 shi relief camp 19 nung jenoka lir, ta state sorkari metetdaksü.

October 4 nü ajungbena Lhonak awatsüng pokmar

tzümetsüng lendong atalokba ajanga state kübok ali kanga nemzüka aliba Teesta ayongkümlen alir aika kongshia liasü.

State nung hydropower project tulutiba, Chungthang dam-a pokdangba ajanga iba lendong kanga mejungi ataloka liasü.

October 18 nü osangbener den jembidang putiri, Arogoi relief camp nung alirtem nem chiyungtsü, süoshi, tzü aser nungdakba mozü balala agütsüdar, ta metetdaksü.

Caritas ajanga maneni Arogoi timtemertem yaritsü, ta paisa metetdaksü.

Khristan volunteer kati, "Tang iba lendong nung asürtem aser samartemji nisungtemi sorkar nem agütsüba osang nung ajemdaker metetdaksüba dang lir, anungji shiba metet, iba dang nungjagi teimba sür alitsü akok," ta ashi.

Sikhim Catholic Association nung general secretary, Mahindra Gurung-i, Arogo balala nungi volunteer 100 shi teyari agütsüba maparen nung yaritepdar, ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sapok

(v) langka ka tema aliba nung tapok apa, arem chipoka ao (tear open, cut open)

* Onok lenmang sapoka aodang kü chitem sapok.

Sapu

(v) aginüba (liking)

* Naga nungeri akshi kanga sapua achir.

OLONG PAITEP # 6671

1			2			3			4	
			5		6		7			
8										
			9							
	10									
									11	12
			13				14			
15							16			

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T ___ lu - (3)
- 10. Takdang temalen - (9)
- 11. Tesa ___ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. ___ ur - (3)
- 4. Kiojen yangludak - (6)
- 6. ___ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. ___ adenshi - (4)
- 14. Tsünüsenbongtsü adokdak - (3)

OLONG PAITEP # 6670 TELANGZÜBA

TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.

Happy Birthday

Semchir **Mr. Lenir** (Choezin)
Nainital, Uttarakhand.
Anogo, ita süitema aoba memeteti!
Tanü 19th Nov 2023' anogo nung
na küm ka ajunger....
Tsüngrem tenüng sangti
aser Ne nem Küm ka ajungba Tepela
salem agutsür
"Happy birthday"

- Ostü, Obo & Family members
Tzudikong Town
Mokokchung, Nagaland.



Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zür, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Tepela Tasoba Anogo



PMAY-G mapa shitak meinyakba atema BDO ka mapa nungi anentsü

Guwahati, October 18, 2023 (Agencies): Assam kübok Manikpur Development Block nung Block Development Officer (BDO) Manjushri Ghosh mapa nungi anentsüo.

Bongaigaon district kübok Manikpur nung Pradhan Mantri Awas Yojana - Gramin (PMAY-G) maparen tim mesüi inyakba atema la mapa nungi anentsü. Assam sorkar kübok Panchayat and Rural Development Department-i October 17 nü Manjushri Ghosh mapa nungi anentsüba metetdakja liasü.

Lai Block Development

Officer (BDO) inyaka aruba mapang PMAY-G kübok ki yangluba maparen nung tim masüba aika puteta liasü.

Bushisüngdangertemi PMAY-G indang beneficiary tem kasa kiojen nung Pucca ki yanglur aliba putet aser AwaasSoft portal nung 'completed' ta aliba ki aika meyangluma liasü.

Ano, kibong ka nungi züngsem aikati PMAY-G house balala lemkük aser job cards maliba den senotsü agütsüba nunga metokmeperi aliba bushitet.

Enquiry team-i bushitetba

osang nung ajemdaker Panchayat & Rural Development Department nung Disciplinary Authority-i Block Development Officer Manjushri Ghosh mapa nungi anentsüsi lemtet.

Assam Service (Discipline & Appeal) Rules, 1964 nung Rule 6(1) nung lateta aliba ama iba mapa inyakogo.

Manjushri Ghosh mapa nungi anentsür aser la nem subsistence allowance agütsüsü. Ajisüaka lai bangdakpur dang nungi temelaba magii headquarters toktsür aotsü makok.

Sikkim tzümetsüng lendong atema State cabinet-i lemtet aika agi

Gangtok, October 18, 2023 (Agencies): Sikkim state cabinet-i Relief Camp nung jenoka alirtem nem rent aid agütsüsü. Iba ya ita asem atema agütsüsü.

October 17, 2023 nü Tashiling Secretariat, Gangtok nung State Cabinet senden amen. Idangji onük 205 benoka lemsatep aser tongtipang lemtet aika agiogo.

Sikkim state cabinet-i Housing Schemes tasen ana metetdaksü aser itemji Sikkim Punarvaas Awaas Yojana aser Sikkim Janta Housing Colony lir. Scheme ana atema Rs. 881,91,00,000/- (Rupees Eight Hundred and Eighty-One Crore and Ninety-One Lakh Only) lemküksüo.

"Sikkim Punarvaas Awaas Yojana" kübok ki 2100 yanglutsü aser Teesta ayong ajanga ponger aoba kibongtem nem agütsüsü.

Sorkari item ki ya sorkar ali mesüra iba nükjidong atema tenla agütsüba ali nung yanglutsü.

"Sikkim Janta Housing Colony" kübok ki 2000 yanglutsü aser iba ya "Rental basis" nung asütsü. Ajisüaka sorkari mezüng küm asem atemabo rent magütsü aser küm asem ajungba sülen sorkari rent latettsü.

Technical Team kati Teesta ayong tzümetsüng ajanga raksatsüba kiojentem asadangtsü. Iba scheme ana tajangzük agütsü atema nisungtem ket nung Sikkim Subject Certificate mesüra Certificate of Identification mesüra Parcha of landed property alitsüla. Iba den Voter Card mesüra Residential Certificate of Sikkim alitsüla. Roads & Bridges Department-ia Rural Development Department ser

Border Road Organization (BRO) den külemi aputem reprangdangtsü aser District Collector temi tzümetsüng samaba Voter Card, Adhar Card, Land Parcha, Ration Card, Birth Certificate, Certificate of Identification, Community Certificate, Trade License amala agütsüsü atema sentongtem agütsü ta state cabinet-isa lemtet agiogo.

Tzümetsüng ajanga osettsüet ajak samaba kaketshir shia nem sorkari Rs.10,000 agütsüsü aser Education Department-i parnok nem textbooks tasen agütsüsü ta cabinet-isa lemtet.

October 4, 2023 tzümetsüng lendong nung Dr. Pema Tenzing Bhutia aser Dawa Tshering Lepcha nati tasütait mapa inyakba atema Cabinet-isa Special State Bravery Award agütsüsü lemtet.

Manipur nung kozüjang shibelener nisung 23 apu

Imphal, October 18, 2023 (Agencies): Bodbarnü Indian security forces-i Manipur nung Myanmar arrtsü anasa kozü bosta 601 puogo aser iba dak sendakba nung nisung 23 apu.

Tanü apuba kozüjangji regional market nung Rs 6.444

crore alang lir. Kozüjang shibelentsü atema amshiba Shaktiman truck gari 13 tashi sepaitemisa puogo.

Tesüiba küm aika Assam Rifles-i Manipur-Myanmar arrtsü nüka arur.

Osang tejangja ka angazükba

sülen Assam Rifles-i mendanga atadang kozüjang shibelena maparen makdok ta defense wing sangdong ka nung ashi,

Assam Rifles sepaitemi apurtem aser kozüjang ajak Forest Department, Kamjong district ket nung agütsüo ta parnokisa ashi.

NAGALAND INSTITUTE OF MEDICAL SCIENCE & RESEARCH (NIMSR)
(Society under the Government of Nagaland. Reg.No: HOME/SRC-7549 dated 01-03-2022)
KOHIMA-797001

ADVERTISEMENT

Nagaland Institute of Medical Sciences & Research (NIMSR) Society, Kohima Nagaland invites application to fill up the following posts.

Sl.No	Name of Post	No.of post	Pay Level	Reservation
1	Librarian	1	ROP 2017 Level-12	--
2	Library Attendant	1	ROP 2017 Level-3	--
3	Technician	4	ROP 2017 Level-8	1 post reserved for Konyak BT, 1 post reserved for Phom BT
4	Electrician	1	ROP 2017 Level-7	--
5	IT Technician	1	ROP 2017 Level-8	--
6	Driver	4	ROP 2017 Level-3	1 post reserved for Sangtam BT

The following eligibility criteria may be downloaded/ accessed from the Nagaland Institute of Medical Sciences & Research (NIMSR) Website <https://nimsr.nagaland.gov.in>

- A. Essential Qualification and experience
- B. Age Limit
- C. Application Submission process and Selection Procedure
- D. General Conditions

Scanned copy in PDF format of the duly filled application along with necessary supporting documents to be submitted through email to nimsrkohima@gmail.com or hard copy of complete application form in prescribed proforma with self-attested documents to the Director NIMSR on or before 2:00 PM on 31.10.2023. Application submitted/received after the last date of submission shall be rejected without any intimation to the candidate.

Sd/-
V.KEZO

Commissioner & Secretary, H&FW & Chairman,
Executive Committee NIMSR, Kohima.

Gaza mozüki nung nisung 500 shi pokset, tenüing senteper

Gaza City, Mongputeni/Oct. 18 (Agencies): Gaza City nung aliba mozüki ka nung Mongulbarnü bomb tesashi ka poka nisung 500 shi asü, ta Hamas-i yimsü asüba Health Ministry ajanga ashi.

Palestine nung telungpuri rocket ka khaloktsüba lenmang meshidaki oa mozüki nung kongshi ta Israel mitkari ashi aser Hamas-ibo Israel nungeri tayimtsü amshia amakdang kongshi ta tenüing senteper.

Yirur alirtem aser dangartem jenoka mozüki sünga alidak iba lendong atalokba osang temai adokba mapang Jordan indang foreign minister-i Amman nung Bodhbarnü senden ka amentsü aliba athier ta ashi, kong US Tir Joe Biden-i Jordan indang King Abdullah II, Palestine Tir Mahmoud Abbas aser Egypt Tir Abdel Fattah el-Sissi nunger den ajuruteptsü liasü.

Rara tuluba mekumdaktsü teimla nung Biden ya Mideast nung arua lir aser Gaza mozüki ka nung iba lendong atalokba asoshi kanga jashir ta shia liasü aser security advisor tem dang osang tejangja bendantsü ashi.

"Gaza nung aliba Al-Ahli Arab hospital nung bomb poklokja nisung aika takum samatsüba asoshi ni kanga jashir," ta Biden-i Israel semdangi aodang sangdong ka nung ashi.

Iba osang angazükli ni Jordan chuba Abdullah II aser Israel Ato Kilonser Benjamin Netanyahu den jembio, ta pai ashi.

"Rara mapang United States-bo civilian takum kumzüka ayutsü asoshi ajak den sako tangatetba nung nokdaka lir aser shirangertem, medical staff aser tai maketertem tepsetba mesüra yiruba asoshi onoki mang ayimer," ta Biden-i ashi.

Israel aser Hamas tsüngta raraba ajanga region lendong tsütsüi nunger aor, ta Jordan Foreign Minister Ayman Safadi-i ashi.

Rara anentsü, Palestine nunger akumtsübotsü aser parnoki langa aliba teyari agütsütsü asoshi senden amentsü ta ajaki molungba sülen ang Jordan-i senden ya ayongzüksü, ta pai ashi.

Biden-i joko Israel dang semdangtsü, ta White House ketdangtsü kati ashi.

Taoba hopta Hamas teloki Israel south tsütsü nisung aika tepsetba sülen Gaza Strip tilaka nungya civilian, aid group aser mozüki nem teyari osettem agütsüdaktsütsü aser US-i Israel mesüzüksü merangba mapang iba lendong ya ataloker. Mozüki tem nung electricity teshibanger, aser nisung meyerijang sa meyerijang chiyongtsü aser tajemtsü tzu bushir.

Mozüki nung iba lendong atalokba ya nisung ajunga samatsütsü merangba lir aser ibai Israel nungeri amakba lir ta Hamas-i ashir.

Israel mitkar temi Islamic Jihad tenüing asener, koba telok tilaba aser 'radical Palestinian militant group' ka lir, shirnoki aiben Israel den raraba nung Hamas den teka amteper. Iba mapang mozüki anasa Islamic Jihad telungpuri rockets aika khalokja liasü aser itdangiter osang aikati ashiba agi ibai rocket mapa shidak meinyaki mozüki nung kongshi ta sayur, ta mitkar temi ashir.

Osangbener den jembidang chief army spokesman, Rear Adm. Daniel Hagari-i ashiba agi, nikongdang 7:00 ako atongtsü lia iba lendong atalokba mapang iba tesem nung air force, ali nungi mesüra tzyüim nungi amakba meliasü ta army temi jangjatetogo.

Kasa mapang rocket khaloktsüba radar temi putet aser telungpur teloktem tsüngta osang agitepba puzük, anungji Islamic Jihad temi rocket tem khaloktsü ta sayur, ta pai ashi.

Mitkar indang drone kati anünglen nungi tangokba video ka Hagari-i sayu aser iba bomb

ya Israel nunger indang masü aser ibai ki tezülen gari anena ayudak apokba lir ta ashi.

Iba yimti aser temeket nung alirtem ajunga dang Gaza Strip south tsütsü ainshitsü totuyuba agütsüba sülen mozüki nungbo bomb mepokloktsütsü südi ta teimla nung Palestine nunger nisung noklang aika Gaza City nung aliba al-Ahli aser danga mozüki tem nung jenoka lir.

Ambulance aser jurila gari kar nung al-Ahli nungi nisung nisung 350 shi Gaza City nung mozüki tuluba, al-Shifa bushia bener ao, kong danga mapang Israel-i bomb pokloktsüadang yirurtem agi sünger lir, ta iba mozüki indang director Mohammed Abu Selmia-i ashi.

Yirur alirtem azü agi sünga aliba atem nung mejangdaksü, shirnok tashi agi ola adoka liasü. "Takdang tilaka nung yipten pongu tashi yua lir. Onok hadir nüngdaker, onok mozü nüngdaker, onok yipten nüngdaker, onok anesthesia nüngdaker," ta Abu Selmia-i ashi aser mozüki indang generator nung atsükba totzü Bodhbarnü agimatsü ya ashi.

"Gaza indang medical sector ghonda ishika tsüngta laotsü."

Al-Ahli mozüki nung iba lendong ya matalokdang Israel-i Gaza nung tayimtsü amshia amakdang nisung 2,778 takum samar liasü aser nisung 9,700 yirur liasü, ta Gaza Health Ministry ajanga shia liasü.

Asürem shilem asem nungi ana tanurtem lir, ta ministry ketdangtsü kati ashi.

Ano Gaza tesem balala nung nisung 1,200 shi ki o jen laoba agi nembanger tasü mesüra takum alitsü akok ta amanger. Hamas teloki October 7 nü Israel south tsütsü amakdang civilian timba sür nisung 1,400 dak tema tepset aser nisung 200 shi Gaza-i pua bener ao

Iba sülen Gaza nung aliba Hamas telungpuri anogoshi Israel kübok yimti balala nung tenük yoker rocket tem khaloktsü.

Email ajanga amokmerenba sülen France nung airport 6 azüngtet

Paris, Mongputeni/October 18 (Agencies): Airport amaktsü amokmerena email tem yokba sülen France nung Bodhbarnü airport trok tashi azüngtetja liasü, ta police source kati AFP dang ashi.

Tawa iba amala mesükba amokmeren yagi France amokmerena arudar.

Paris anasa Lille, Lyon, Nantes, Nice, Toulouse aser Beauvais airport tem azüngtetba ajanga ketdangtsürtem nem ken o tejangjaba angatetdaksütsü aser amokmeren ya shitak asü tai aji jangjatsü, ta source-isa shisem.

October 7 nü Hamas puri Israel amakba sülen France bomb amshia amaktsü amokmerena aruogo aser tang tesüsa airport amaktsüba amokmerenogo. Iba den küleml

Hokolbarnü Arras yimti nung Islamic State den sendaktepa lir ta ashiba nisung kati tesayur ka kotari agi tsüngsetba sülen Bodhbarnü email ya agizüka liasü.

France indang DGAC aviation authority otongdar kati, bomb pokdaktsütsü amokmerenba sülen Lille, Lyon, Toulouse aser Beauvais airport tem dang azüngtetba liasü ta ashi, ajisüaka iba dak sendakba nung osang tejangja magütsü.

DGAC indang online dashboard ajanga Lille, Lyon aser Toulouse nung tayimtsütem kanga menor apusoba sayuogo.

Nice airport indang X (formerly Twitter) account nung post ka ajanga ashiba agi, airport nung kibur maliba yangku ka ngutetba sülen akhi ama bushisüngdangtsü atema

security perimeter ka amenoka liasü.

"Tensa tangbo akhi ama kanga junga lir," ta kasa sangdong ajanga metetdaksü.

Lyon indang Bron airport ketdangtsürtemi ashiba agi, maparen ajak taoba mapang ama inyaksangshitsü asoshi temelaba agütsüogo.

Lille nung airport otongdar kati ashiba agi, tayimtsü asem divert süogo. Kasa mapang nung airport X sabang ajanga ashiba agi, security forces tem airport nung inyaksangshidar.

Ken o dak sendakba nung passenger temi social media ajanga osang kecha melemsatet aser parnok rongnung karibo parnok kechiba airport nungi anin, aji dena mejangja liasü, ta kasa sangdong ajanga metetdaksü.

LONGKHUM PONGEN NUNGSHI KI Lapokba Sentong

Anogo : 24th October 2023, Mapang: 10:30 AM
Tesentepdak : Pongen Salang, Longkhum

Tongti Tesemdanger : Shri. T.N. Mannen, IAS (Rtd)
Advisor for Law & Justice and
Land Revenue, Nagaland

NUNGSHI KI LAPOKBA MAPANG

Nungshi Ki Meshiteta Sarasademtsü :
Rev. T. Aka Jamir, Pastor LBA

- Sentong Lenir : Sp. Ongru & Kr. Adenla Pongen
- Sarasademtsü : Wb. Zulu Sor, Pastor, NCRN Longkhum
- Nungshi Ki Ratet : Wb. Tongpok Pongen (Tatar)
- Tayongzükba O : i. Guru T. Bendangwati Pongen, Tir, Aoli Pongen Mungdang
ii. Wb. C. Angang, Council Chairman Longkhum
- Ken ka : Arogotsür, Alichen Baptist Arogo
- Sobaliba Ken : Mejensanger Pongen Kidong Longkhum
- Tongti Tesemdanger O :
- Ken ka : Kr. Tiasola Imchen
- Melepszüng O : Wb. Kikum Pongen
- Tatem Sarasadem : Rev. L. Tia Jamir, Pastor Alichen Baptist Arogo

- * Ajaki iba sentong takok asoshi sarasadema atadi.
- * Sentong temer lokti chiyongba mapang alitsü.

	NATIONAL SCHOOL OF DRAMA NEW DELHI- 110001 (An autonomous Institution of Ministry of Culture, Govt. of India)	
CALL FOR ENTRIES		
23rd BHARAT RANG MAHOTSAV, 2024 (INTERNATIONAL THEATRE FESTIVAL OF INDIA)		
<p>New Delhi aser danga yimitem nung February, 2024 nung agitsü aliba 2318 Bharat Rang Mahotsav-International Theatre Festival of India nung shilem agitsü atema National School of Drama ajanga proposals meshir.</p> <p>India aser bendanglen nungi janra aliba Theatre groups/ Drama Institutions/Theatre Organizations/ Directors nungi application meshir.</p> <p>Osangtsüsang tejangja aser application form atema NSD website www.nsd.gov.in nung angutsü (Link ya October 20, 2023 nü activate asütsü).</p> <p>Application agütsütsü asoshi November 10, 2023 ya tatem alitsü.</p> <p>Metetpelatsü atema: Phone: 011-23073647, 011-23031102 Website: www.nsd.gov.in CBC 09130/12/0012/2324</p>		

Iran-i Israel nem tenokdangba agütsütsü ayongzük

Tehran, Mongputeni/October 18 (Agencies): Organisation of Islamic Cooperation (OIC) züngsemtemi Israel nem totzü magütsütsü aser tenokdangba Amirabdollahian-isa, Gaza balala agütsüba den Israel nung Israel-i aibelenba indang ambassador tem mintoktsüla, mangaoka ayutsü atema ta Iran Foreign Minister Hossein Amirabdollahian-i Islamic obendangertem team ka tentettsü asoshi ayongzüka liasü.

Bodhbarnü ashi.

Mongolbarnü nikongtsütsü Iran aser Israel nabo kecha Gaza nung moziiki ka poksaja tesendaktep mali.

Palestine nunger aika tepsetba Mongolbarnü Gaza nung mozüki ka mepoksa tsüngda Gaza nung ketdangtsürtemi aliba sensak asemtsü atema ashiba agi, Hamas puri OIC senden ka Saudi kübok October 7 nü south Israel maka Jeddah yimti nung menogo. nisung 1,300 tepsetba den nisung 200 shi Gaza-i pur aoba

"Foreign minister-i Islamic linüktem dang totzü densema sülen Israel-i anogo 11 tashi Israel nem tenokdangba balala Gaza nung nung bomb agütsütsü aser Zionist sorkar pokloktsüba mapang nisung den tesendaktep yanglur lira 3,000 shi süogo.

US sorkar Global Sports Program atema Kajiloni shimogo



Dimapur, Mongputeni/October 18 (TYO): Nagaland nungi H. Kajiiloni Krichena, Argentina, Bolivia, Brazil, Cape Verde, Colombia, Czech Republic, France, Fiji, India, Indonesia, Kosovo, Singapore, Saudi Arabia, Samoa, Uganda aser Uzbekistan nungi saisapong balala atema asayar 16 den külemi Global Sports Mentoring Program (GSMP) nung shilem agitsü atema shimogo.

Iba sentong nung shilem agitsü atema la ya Nagaland Olympic Association Secretary

General aser US State Department's International Visitor Leadership Program Alumni Abu Metha-i nominate süa liasü.

GSPM ya United States sorkar kübok Sports Diplomacy program ka lir aser iba sentong ya ESPN den longjemer inyaksangshir. Sentong nung linük balala nungi tetsür lenirtem hopta pong asoshi mentorship program ka atema adenshir, koba parnok lokti nung temelenshi tajung ka bener arutsütsü nükjidong nung inyaksangshir.

Iba sentong ya team-building, social entrepreneurship, innovation, leadership aser action planning dak rangloker agir.

Taoba mapang Krichena ya Indian Olympic Association-i, Seoul National University, South Korea nung Masters in Global Sports Management agitsü atema nominate süa liasü. La tang Nagaland Olympic Association nung Sports Operations Officer ama inyaker aser la sports federations balala den inyakba den World Championships, World Cup aser International Sports Events balala nung shilem agiogo.

GSPM nung lai shilem agiba ya Nagaland nung saisapong atema konang tetushi ka lir aser taruba kümtem nunga lai saisapong nung teyari tulu agütsütsü, ta NOA-i ashiba den NOA-isa la nem tenüngsang agütsü aser tarutsü nung takok nguyonga aotsü imlaja ataba lemsatepa liasü.

Maneni Nagaland Olympic Association-isa, nomination agizükba aser Nagaland nung Sports fraternity den longjemer inyakba atema Kolkata nung US Consulate India nung US Embassy aser Kolkata nung American Centre dang kanga pelaba lemsatepa liasü.

Dimapur-i Inter-High School Sepaktakraw tournament kokogo



Kohima, Mongputeni/October 18 (TYO): Bodhbarnü Dimapur district-i State level inter-high school Sepaktakraw tournament nung tetsür aser tebur asaya naprongla kokogo. Iba asayamung ya Department of Youth Resources and Sports-i ayongzüka Indira Gandhi Stadium nung asayaogo.

Final asaya anaprongla nung Dimapur-i Niuland koka liasü.

Tebur asaya nung Noklak aser Mon na tasembuba aser pezübuba nung liasü aser tetsür asaya nung Mokokchung aser Phek na tasembuba aser pezübuba nung liasü.

Takoker nem senpet, medal aser kuli kaket agütsüogo.

Asayamung shibangba sentong nung alakteta jaoker

YRS Additional Director Meguolhou Dolie liasü. Pai ashiba agi department-i 2018 küm nungi State Sports Hostel Dimapur nung Sepaktakraw training agüja arudar.

Paisa, tang tashi nung category balala nung asayar 100 dak tema anitetogo aser Nagaland nungi international asayar 15 anitetogo, ta ashi.

Meguolhou-i, lanurtem dang meranga inyaka temaba jenjang tongtetsü merangtsü ajungshia liasü.

Iba sentong ya YRS Deputy Director Jakedovo Chase lenisüba nung agi aser Assistant Director Nyuvitho Nyuthe-i tepela o jembiba den Peniel CRC Pastor Khrieneiu Metha-i tenüngsang agüja sarasademer sentong tembanga liasü.

Syed Mustaq Ali Trophy: Nagaland team-i Tripura makok

Dimapur, Mongputeni/October 18 (TYO): Bodhbarnü Syed Mustaq Ali Trophy nung Nagaland team-i wicket 3 agi Tripura makok. Iba asaya ya Abhimanyu Cricket Academy, Dehradun nung asaya liasü.

Asaya ya Nagaland team-i kokera lila ajisiüaka opener anati asaya kanga junga tenüksüba sülen tanungba asayartemi junga masayatet aser iba den wicket asem tashi agitsü asoshi maangka anguba Nagaland team-i magiteti liasü. Maongkatem magitetaka Nagaland team kanga renloka aoba iba asaya nung reprangtetogo aser asayartem tang kanga teyakyaba aser fielding-a tajungba akümba reprangtetogo.

Toss akokba sülen Nagaland team captain Jonathan Rongsen-i mezüng bat asütsü shim aser Nagaland opener, Sedezhalie Rupreo (31 runs) aser Joshua Ben Longkumer (46 runs) nati asaya kanga junga tenzüka over 12 nung run 82 yanglu aser iba mapang tashi nungbo Nagaland team-i run aika yanglutsü ama bilema liasü.

Ajisüaka Tripura team bowler tem rongnungi AS Sarkar-i ball kanga junga ona pai Joshua Ben Longkumer aser

Sumit Kumar (21 runs) na indang wicket agia liasü. Iba sülen Jonathan Rongsen* (13 runs *Not Out) aser Hokaito Zhimomi (8 runs) nati score board nung run tera bendenloka parnoki run 129 yanglu aser Tripura team nem target run 130 toktsü.

Asaya tanabuba shilem nung Tripura opener Bikram Kumar Das (4 runs) mezüngbuba over nung out süatok, ajisiüaka nungtugu asayar Wriddhiman Saha (run 41), shiba tang Tripura team nungi asayadar pai anir par team-i kanga junga asaya liasü. Tripura team nungisa N Sen Choudhury-i run 28 aser RA Dey-i run 24 yanglua liasü.

Nagaland team bowler tem rongnungi Jaganath Sinivas-i wicket 3, Tahmeed Rehman-i 2 aser Khrievitso Kense-i wicket 1 agia liasü.

Nagaland team mezüngbuba asaya Madhya Pradesh den asayatsü liasü saka tzünglu aruba ajanga masayatet. Nagaland team October 19 nü 11 ako nungi tenzüka Delhi den Maharana Pratap College Ground, Dehradun nung asayatsü.

Asaya live Jio Applications aser sports18 channel nung reprangtetsü.

MDFA: Moanungsang MSC aser Telongjem FC nati takok angu



Oct 18 nü Imkongmeren Sports Complex, Mokokchung nung MDFA Trophy Arka United aser Telongjem FC na asayaba mapang tangokba noksa nung angur. Mokokchung, 18th October, 2023 (Photo courtesy: Imnawabang Jamir)

Mokokchung, Oct 18 (TYO): Oct 17 nungi tenzüka yangi Imkongmeren Sports Complex, Mokokchung nung 'MDFA Trophy 2023' asaya tenzüko.

Oct 18 nü mezüng asaya Moanungsang MSC o Dare Devils na asayaba MMSC-i goal 5-1 agi DD madak takok tulu angu. MMSC pur atema mezüng goal ji minute 23 nung jersey No. 6, Molutsung-i idaktsü. Par telok asoshi tanabuba goal ji 37 minute nung jersey No. 5, Inovi (C)-i yok. Iba sülen minute 51 & 75 nung MMSC nungisa Jersey no. 10, Meyasenba-i goal ana agütsü

aser asaya atemtsü second ishika dang lia ano MMSC nungisa Jersey No. 8, Aripongi 90+1 minute nung goal ka idaktsü. Dare Devils-ia goal ka küptok aser iba goal ji Jersey No. 33, Helngam-i minute 58 nung idaktsü.

Tanabuba asaya, Arka United o defending champion Telongjem FC na asayaba, Telongjem-i goal 3-1 agi Arka United pur akok. Telongjem nungi Jersey No. 7, Nyithong Magh-i asaya tenzüker minute 2 dang or lia goal ka agütsü aser paisa minute 59 nunga goal ka idaktsü. Ano Telongjem nungi Jersey No. 3, Tongpangjungshi

Jamir-i minute 38 nung goal ka yok. Arka United-ia goal ka agütsü aser iba goal ji Jersey No. 11, Kumangtongzuk-i minute 45 nung yok.

Taküm iba asayamung nung telok 14-i shilem agitsü aser Nov 3, 2023 nü tembangtsü. Iba asayamung shir teloki bendir parnok nem senpet sen den trophy, kulikaket aser medal dena agütsütsü. Iba den nija senpet-a kar shimteta agütsütsü.

Oct 19, 2023 asaya yamai alitsü:

1st Legendary Vs Zonipang S/A @ 12:00 Noon
2nd Super Seniors Vs KSR Team @ 2:00 PM

BILEMDANGANG

"Merangdang mekokra kecha maksü mali."